



Revisiun dil regulativ da taxas tier la lescha davart igl allontanament e la purificaziun dallas auas

Adattaziun dallas taxas annualas

M E S S A D I

dalla suprastanza communal a al cussegl da vischnaunca

Preziau signur president
Preziadas signuras cusseglieras
Prezai signurs cussegliers

Finanziaziun speciala

Per la canalisaziun e la serenera vegn ina finanziaziun speciala applicada. Tenor quei principi ston las expensas vegnir finanziadas cun taxas aposta per quella sparta. Quei ei dapi ditg buca pli il cass. Gia avon entgins onns ha la cumissiun da gestiun fatg attents sin quei fatg e giavischau ina correctura. A caschun dalla revisiun dil quen 2009 ei quella problematica danovamein vegnida discussiunada. En lur rapport fan ils revisiurs externs medemamein attents sin quella situaziun buca cuntenteivla.

In considerabel deficit

El *program d'activitad 2009 – 2012* ei ina revisiun dil regulativ da taxas tier la lescha davart igl allontanament e la purificaziun dallas auas previda. Quella ei necessaria per saver reglar la finanziaziun (adattaziun dallas taxas).

Il svilup dallas entradas ed expensas dils davos onns se presenta sco suonda:

	<i>Quen 2007</i>	<i>Quen 2008</i>	<i>Quen 2009</i>
Entradas	frs. 490'608.35	frs. 485'273.75	frs. 493'453.85
Expensas	<u>frs. 832'155.50</u>	<u>frs. 796'181.39</u>	<u>frs. 688'676.84</u>
Conto d'ulivaziun	frs. -341'547.15	frs. -310'907.65	frs. -195'222.90
Entradas taxas da colligiazion	<u>frs. 165'827.90</u>	<u>frs. 119'616.35</u>	<u>frs. 46'965.20</u>
Deficit annual	frs. -175'719.25	frs. -191'291.30	frs. -148'258.70

El quen 2009 muntan las taxas a frs. 493'500.--, las expensas denton a frs. 688'700.--, aschia ch'ei seresulta in manco da frs. 195'200.--. En quella summa ei in importo da frs. 253'869.45 per las amortisaziuns cuntenius.

Las entradas per la colligiazion alla canalisaziun ed alla serenera digl onn 2009 muntan mo frs. 46'965.20. Pil futur astgein nus buca quintar cun considerablas midadas, num ch'il ressort Acla da Fontauna ni autras surbaghegiadas vegnien erigidas.

Entochen oz eis ei vegniu investau per canalisaziun e serenera en tut biebein 13 milliuns francs. La fin digl onn 2009 eran aunc *frs. 2'297'764.--* activai (tabella I).

Il manco total dalla posiziun "canalisaziun e serenera" munta per ils 31.12.2009 a *frs. 607'599.67*. Tenor ils principis dalla finanziaziun speciala sto quei manco vegnir ulivaus entras las contribuziuns per la colligiazion alla canalisaziun ed alla serenera sco era entras las taxas annualas. Ina adattaziun dallas contribuziuns da colligiazion ei buca prudenta. Per quei drova ei ina adattaziun dallas taxas annualas, sco quei ei repetidamein vegniu discussiunau e postulau. A vesta digl alzament dil pei da taglia, decidius ils 24 da fevrer 2008, han ins vuliu spetgar cun quella correctura. Ussa ei ina tala denton inevitabla.

Basa legala

La lescha davart igl allontanament e la purificaziun dallas auas (art. 34) fixescha las suandontas limitas per in alzament:

Taxas ¹La taxa fundamentala da provediment per il diever dalla canalisaziun e dalla serenera munta a:

Classa d'objects 1:	frs. 0.30 entochen frs. 0.90 per m ³
Classa d'objects 2:	frs. 0.20 entochen frs. 0.70 per m ³
Classa d'objects 3:	frs. 0.10 entochen frs. 0.50 per m ³
Classa d'objects 4:	frs. 0.10 entochen frs. 0.30 per m ³

²La taxa da consum munta a: frs. 0.10 entochen frs. 0.60 per m³.

³La taxa annuala vegn fixada enteifer las limitas suramenziunadas en in regulativ da taxas relaschus dil cussegl da vischnaunca. Objects colligiai mo alla canalisaziun, denton aunc buca alla serenera, han da pagar mintgamai la mesadad dallas taxas fixadas.

⁴Edificis colligiai che sfundran las auas da tetg e las auas dalla drenascha ni che meinan ellas directamein en in prefluent obtegnan ina reducziun da 10 % sin las taxas annualas fixadas en questa lescha.

Revisiun dil regulativ da taxas

Las taxas che vegnan incassadas ein fixadas el *regulativ da taxas* e sepresentan sco suonda:

Art. 3

	<i>Taxa fundamentala da provediment tenor m³ volumen construius tenor SIA</i>	Taxa fundamentala da provediment per la canalisaziun e la serenera
Classa d'objects 1	frs. 0.30 per m ³	
Classa d'objects 2	frs. 0.25 per m ³	
Classa d'objects 3	frs. 0.15 per m ³	
Classa d'objects 4	frs. 0.10 per m ³	

Art. 4

	<i>Taxa da consum tenor m³ aua schubra</i>	Taxa da consum per la canalisaziun e la serenera
Taxa da consum	frs. 0.50 per m ³	

Art. 5

		Taxa pauschala da consum
La taxa pauschala da consum tenor art. 33, lit. 5 dalla lescha davart igl allontanament e la purificaziun dallas auas munta:		
a) baghetgs senza colligiazioni cun aua	frs. 0.00	
b) baghetgs cun pign consum d'aua	frs. 15.00	

La taxas che vegnan effectivamein incassadas ein per part lunsch sut las limitas lubidas dalla cuminonza dils votants. Ina adattaziun sa succeder cun ina revisiun dil regulativ da taxas. Quella cumpetenza cumpeta al cussegl da vischnaunca. Lez ha la cumpetenza da far in considerabel augment. Risguardond ils fatgs suraallegai ei in augment dallas taxas ella dimensiun da 20 entochen 30 % necessaris e responsabels. Per facilitar la decisiun ein treis variantas vegnidadas calculadas.

Cun la minimala (varianta 1: 11%) recaltgein nus in augment da frs. 51'412.-, cun la varianta 2 (18%) frs. 84'397.- e cun la 3. varianta (augment da 27%) in import da frs. 121'700.-. Per contonscher ina ulivaziun bunamein cumpleina drova ei la varianta 3 (tabella II).

Ponderaziuns

Ils proxims onns sto la vischnaunca far considerablas investiziuns per novas canalisaziuns e sereneras. Denter auter pertucca quei Mumpé Medel (frs. 510'000) sco era Cavardiras

(frs. 550'000) e Pardomat-Madernal (frs. 250'000). A vesta da quella situaziun eis ei prudent da far ussa las empremas correcturas.

Tier la fixaziun dallas taxas drova ei ina certa proporziun denter las taxas fundamentalas e las taxas da diever. Quei ei stau in impurtont aspect tier l'elaboraziun dalla lescha davart igl allontanament e la purificaziun dallas auas. En il messadi per la votaziun dils 10 da zercladur 2001 eis ei francau il suandont: "La taxa annuala duei sebasar sil volumen dil baghetg colligiau. La taxa annuala sto denton era cuntener ina cumponenta che sebasea sil consum d'aua effectiv. La taxa fundamentala duei cuviera ca. 2/3 dalla taxa annuala. Rodund 1/3 dalla taxa annuala duei vegnir incassada sin fundament dil consum d'aua tener il dumbrader d'aua". La proposta presentada risguarda pli u meins quella relaziun.

Proposta

Sin fundament da quellas consideraziuns

p r o p o n a

la suprastanza communal al cussegl da vischnaunca:

1. d'approbar la revisiun dil regulativ da taxas tier la lescha davart igl allontanament e la purificaziun dallas auas;
2. da metter quella revisiun retroactivamein en vigur cun igl empren da schaner 2010.

Suprastanza communal Disentis/Mustér

Il president:

Il canzlist:


Dumeni Columberg


Andri Hendry

Disentis/Mustér, ils 22 da mars 2010

- Tabellas I + II
- Sboz per la revisiun dil regulativ da taxas